



種 — 寫分高雄氣爆受難家屬
(海陸腔客語)

揀起一皮焦黃个葉仔
在烈火燒過
煙火冷滅以後
夾在貴貴字典第七百三十一頁當中
密密幼幼个字係大大細細个沙石
方方狹狹个框 改做
家園个田坵
頭那頂青天敵來幾口大氣
田塍角縫罅也鑽入幾下隻白蟻
日日 夜夜
夜夜 日日
齧等烏黝黝个書頁
※ ※ ※
係蟲蟻樣
在看毋著个深土底肚蠕蠕鑽過
係補鑊烏樣
在無人个時節正敢佇深林肚放聲大噉
苦丟丟个陰痛啊——
就在字膠字
溝壠膠溝壠中央个石跳仔頂
行過
※ ※ ※
逐日逐日僵來到這
用掩土个雙手來壅泥
用還毋忒个目汁來淋水
流流流流 漾漾漾漾
逐月逐月
脈脈个清風在城市窗門背掠仔過
滴滴濳濳个水毛仔以後又係
雲開日出天放晴

※ ※ ※

毋知幾久

上心个葉仔又係一片青里里

毋知哪時

晁晁个樹尾又綻出嫩習習个芽苗

※ ※ ※

斯愛偈來耕種

結偈 鋪石 整地 掘泥

一叢叢个樹仔過企跣起來

一蕊蕊个紅花續等開在

路頭脣項

※ ※ ※

斯愛偈來耕種

結偈鋪石整地掘泥

一叢叢个樹仔過企跣起來

一蕊蕊个紅花續等開在

路頭脣項

※ ※ ※

斯愛偈來耕種

種落相思个樹

結出苦棟仔籽

華華个月光又會照耀四方

晟眼个春光日又會

轉到人間

※ ※ ※

斯愛偈來耕種

愛種麼个

種麼个好呢——

這兜

通棚等等偈

從頭來耕種



作者感言

邱湘雲（筆名：湘子） 彰化師大臺文所教授

係鄭愁予个詩：「是誰傳下這詩人的行業／黃昏裏掛起一盞燈」，係啊，詩歌總像社會人生个一面鏡仔，面對人生當中種種个苦樂摻悲喜，詩人總係「我心悠悠」到「沉吟難寐」。

值此天災無常，人世多變个世間，詩人豈可能無感，又豈會無詩。這係獻分 2014 年 7 月 31 日高雄氣爆受難家屬个一首詩。用客語寫社會詩係一種試驗，想愛展現个係：用客家漢字進行現代詩歌創作共樣做得表達對這片土地、這坵家園摻這隻社會深深个關愛，並毋會有語言个阻隔。

人間因為有愛，正會樂對方所樂，痛對方所痛。這首詩用「種」做題目名，用意在一語雙關：「種」字讀音、意思有兩種，一係「種下」，二係「種仔」，面對人生多災多難个勞碌折磨，期盼大自家在災難過後，永遠愛記得佇心中種下痛惜个種仔，種下思念个種仔，種下希望个種仔，相信恁樣所有个痛苦都會化作下一代種仔个養份，化做春泥來保護這片偲佢深愛个土地。